

Na temelju Statuta Islamske zajednice Bošnjaka u Švedskoj, član 13 i Statuta Udruženja ilmije Islamske zajednice u Bosni i Hercegovini, član 16, Skupština imama i muallima IZBUŠ, na sjednici, održanoj 29. aprila 2014. godine u Gislavedu usvojila je prečišćeni tekst Statuta Udruženja, kako slijedi:

## **STATUT UDRUŽENJA ILMIJE ISLAMSKJE ZAJEDNICE BOŠNJAKA U ŠVEDSKOJ**

### **I OPĆE ODREDBE**

#### **Član 1.**

Ovim Statutom uređuju se organizacija, ciljevi, zadaci i aktivnosti Udruženja ilmije IZBUŠ (u daljem tekstu: Udruženje).

#### **Član 2.**

Udruženje je udruženje aktivnih i penzionisanih imama i muallima u IZBUŠ. Udruženje ima svojstvo pravnog lica, a djeluje u okviru Islamske zajednice Bošnjaka u Švedskoj, kao ogranak Udruženja ilmije IZ u BiH, i svoje aktivnosti provodi u skladu sa Kur'anom i Sunnetom Muhammeda, s.a.v.s.

#### **Član 3.**

Rad Udruženja je javan.

#### **Član 4.**

Puni naziv Udruženja glasi: Udruženje ilmije Islamske zajednice Bošnjaka u Švedskoj. Sjedište Udruženja je u mjestu boravka predsjednika Udruženja.

#### **Član 5.**

Udruženje u odnosima sa trećim licima predstavlja i zastupa predsjednik Udruženja, sekretar ili osoba koju ovlasti predsjednik.

#### **Član 6.**

Udruženje ima pečat okruglog oblika priječnika 30 mm sa tekstom ispisanim latinicom u koncentričnim krugovima: Udruženja ilmije Islamske zajednice Bošnjaka u Švedskoj, na bosanskom i švedskom jeziku.

#### **Član 7.**

Unutar Udruženja mogu se formirati radne grupe radi efikasnijeg rada i djelovanja. Odluku o osnivanju radnih grupa donosi Upravni odbor Udruženja i usvaja program njihovog rada.

### **II CILJEVI I ZADACI**

#### **Član 8.**

Ciljevi i zadaci Udruženja su:

- unaprjeđenje islamskog odgoja i stručne naobrazbe članstva;
- brine o statusu svojih članova te poduzima aktivnosti na očuvanju časti i ugleda imamskog zvanja;
- nabavlja i izdaje stručnu literaturu, časopise, listove i drugu publikaciju;
- brine se o invalidima, bolesnicima i penzionerima iz redova Udruženja;
- pružanje odgovarajuće pažnje i pomoći porodicama poginulih i umrlih članova Udruženja;
- odgovarajuća saradnja sa sličnim institucijama i asocijacijama.

### **III ČLANSTVO**

#### **Član 9.**

Članovi Udruženja mogu biti samo aktivni i penzionisani/e imami i muallime u IZBUŠ ukoliko prihvate Statut Udruženja. Članom Udruženja se postaje potpisivanjem pristupnice.

Prijem u članstvo Udruženja se ostvaruje putem potpisane pristupnice, a članstvo odobrava Skupština na prijedlog Upravnog odbora Udruženja.

#### **Član 10.**

Članovi Udruženja plaćaju članarinu čiju visinu i način plaćanja određuje Skupština.

#### **Član 11.**

Članom Udruženja prestaje se biti:

- dobrovoljnim istupanjem,
- isključenjem na osnovu pravosnažnog rješenja Suda o članstvu,
- isključenjem iz službe Islamske zajednice pravosnažnim rješenjem nadležnog organa Islamske zajednice ili povlačenjem saglasnosti za rad izdate od nadležnog organa Islamske zajednice,
- smrću.

#### **Član 12.**

Obaveze članova Udruženja su:

- da poštuju Statut i druge normativne akte Udruženja;
- da plaćaju članarinu koju odredi Skupština;
- da poštuju i izvršavaju odluke Rijaseta koje se odnose na dijasporu kao i odluke od općeg značaja za muslimane;
- da čuvaju instituciju imameta i da se pridržavaju kodeksa imama i čuvaju čast svakog muslimana;
- da rade na ostvarivanju ciljeva Udruženja i ispunjavaju povjerene im emanete i obaveze;

#### **Član 13.**

Prava članova Udruženja su:

- da u skladu sa normativnim aktima punopravno učestvuju u radu i aktivnostima Udruženja;
- da biraju i budu birani u organe Udruženja;
- da budu obaviješteni o radu Udruženja;
- da od organa Udruženja traže pomoć za zaštitu kod povrede njihovih radnih i drugih prava.

### **IV ORGANI UDRUŽENJA**

#### **Član 14.**

Organi Udruženja su:

- Skupština,
- Upravni odbor,
- Nadzorni odbor,
- Sud o članstvu,

#### **Član 15.**

##### **1. Skupština**

Skupština je najviše tijelo Udruženja. Svi članovi imaju pravo i obavezu prisustvovati Skupštini.

Skupština se održava svake godine u februaru mjesecu, a vanredna po potrebi. U oba slučaja Skupštinu saziva predsjednik na osnovu odluke Upravnog odbora.

#### **Član 16.**

Do izbora Radnog predsjedništva Skupštinom predsjedava predsjednik Upravnog odbora. Skupština može donositi punovažne odluke ako Skupštini prisustvuje natpolovična većina delegata. Rad Skupštine se odvija prema Poslovniku o radu Skupštine.

#### **Član 17.**

Ako Skupština Udruženja raspravlja o izmjenama Statuta, prestanku rada Udruženja kao i o drugim bitnim pitanjima donešene odluke su punovažne ako je za njih glasa najmanje dvije trećine prisutnih delegata.

## **Član 18.**

Zadaci Skupštine Udruženja su :

- da donosi Statut i druge opće akte Udruženja;
- da razmatra i usvaja izvještaje o radu Upravnog odbora, Nadzornog odbora i Suda o članstvu;
- da vrši izbor članova Upravnog odbora;
- da vrši izbor Nadzornog odbora;
- da vrši izbor Suda o članstvu;
- da razrješava izvršna ili počasna tijela Udruženja,
- da usvaja godišnji plan rada i budžet,
- da donosi druge odluke od interesa Udruženja.

## **Član 19.**

### **2. Upravni odbor**

Upravni odbor je izvršni organ Udruženja .

Upravni odbor sačinjavaju predsjednik, sekretar, blagajnik, dva člana i dva zamjenika.

Upravni odbor:

- sprovodi u djelo program rada, budžet, odluke i zaključke Skupštine;
- organizira seminare i druge oblike profesionalne nadgradnje članova;
- organizira studijske posjete istim i sličnim organizacijama;
- vodi brigu da članovi Udruženja izvršavaju svoje obaveze i ostvaruju svoja prava ustanovljena Statutom i drugim aktima Udruženja;
- predlaže Skupštini prijem novih članova u Udruženje;
- donosi odluka i pravila o formiranju i radu fondova, te upravlja imovinom Udruženja;
- priprema i predlaže Skupštini programa rada i budžet Udruženja;
- vodi brigu o zapošljavanju (stalnom i honorarnom) članova Udruženja, te daje saglasnost o njihovom zaposlenju prije potpisivanja ugovora o zaposlenju.
- daje saglasnost prilikom premiještanja na drugo radno mjesto, napuštanja radnog mjesta ili otkaza člana Udruženja.
- podnosi izvještaj o radu i ekonomski izvještaj na usvajanje Skupštini.

## **Član 20.**

Redovne sjednice Upravnog odbora održavaju se svaka tri mjeseca, a vanredne po potrebi.

Sjednice Upravnog odbora saziva i njima predsjedava predsjednik Udruženja, a u njegovom odsustvu ili spriječenosti sekretar.

Upravni odbor svoje odluke donosi većinom glasova prisutnih članova. Upravni odbor može donositi punovažne odluke na sjednici ako je sjednici prisutna natpolovična većina članova.

U nemogućnosti prisustva sastanku nekog od članova Upravnog odbora na sastanak će se pozvati jedan od zamjenika.

## **Član 21.**

Radom Upravnog odbora Udruženja rukovodi predsjednik.

Predsjednik odbora Udruženja podnosi pismeni izvještaj o radu Upravnog odbora Skupštini.

Predsjedniku Upravnog odbora Udruženja u radu pomažu sekretar i blagajnik.

Članovi Upravnog Odbora biraju se na Skupštini.

## **Član 22.**

### **3. Nadzorni odbor**

Nadzorni odbor Udruženja vrši reviziju materijalno-finansijskog poslovanja Udruženja i sprovođenje skupštinskih odluka i zaključaka. Nadzorni odbor ima 3 člana, koji između sebe biraju predsjednika.

Članovi Nadzornog odbora biraju se na Skupštini.

#### **Član 23.**

Nadzorni odbor Udruženja vrši pregled finansijskog i materijalnog poslovanja Udruženja i u pismenoj formi podnosi Skupštini.

#### **Član 24.**

##### **4. Sud o članstvu:**

Sud o članstvu pomaže u rješavanju eventualnih nesuglasica među članovima. Sud o članstvu predlaže izmjene i tumači odredbe Statuta. Sud o članstvu ima 3 člana, najstariji je i predsjednik Suda. Sud o članstvu se sastaje po potrebi, a najmanje jedanput godišnje. Odluke Suda o članstvu su obavezne za sve članove. Samo jedan član Upravnog odbora može biti i članom Suda o članstvu. Članovi Suda o članstvu biraju se na Skupštini.

### **V IMOVINA UDRUŽENJA I NJENO KORIŠTENJE**

#### **Član 25.**

Rad Udruženja finansira se sredstvima koja se osiguravaju putem:

- članarine;
- dotacija IZBUŠ, BEMUF i drugih institucija i ustanova;
- izdavanjem i prodajom literature;
- dobrovoljnih priloga i drugih prihoda.

#### **Član 26.**

Nalogodavac za trošenje sredstava po prethodnom članu je predsjednik Udruženja. Novčane transakcije se vrše putem računa, a za njih su ovlašteni predsjednik i blagajnik Udruženja.

#### **Član 27.**

Sredstva Udruženja mogu se trošiti za:

- rad organa Udruženja;
- organiziranje predavanja, kurseva, seminara, ekskurzija i drugih aktivnosti kojima se poboljšava i unaprjeđuje djelovanje Udruženja;
- pružanje materijalne pomoći članovima Udruženja i njihovim porodicama;
- davanje pozajmice članovima Udruženja;
- davanje nagrada posebno aktivnim članovima Udruženja.

### **VI PRELAZNE I ZAVRŠNE ODREDBE**

#### **Član 28.**

Ovaj Statut je usvojen ako za njega glasa najmanje dvije trećine prisutnih delegata na Skupštini, a stupa na snagu danom njegovog usvajanja.

#### **Član 29.**

Izmjene i dopune Statuta se provode na isti način kako je propisano njegovo usvajanje. Prijedlog za izmjene i dopune može podnijeti Upravni odbor ili jedna trećina članova Udruženja.

#### **Član 30.**

Ako Udruženje odlukom Skupštine prestane sa radom, imovina Udruženja se prenosi u poseban fond IZBUŠ. Ukoliko u toku tri godine ne dođe do obnove rada Udruženja, imovina će se u vidu stipendija dodijeliti učenicima medresa i studentima visokih islamskih škola u Bosni i Hercegovini.

Predsjednik Udruženja

